

**Kebolehpercayaan Rakyat Intipati Penting Pada PRU-13, Kata Najib Bernama
6 April, 2013**

KUALA LUMPUR, 6 April (Bernama) -- Datuk Seri Najib Tun Razak berkata kebolehpercayaan adalah perkara penting yang perlu dinilai oleh pengundi dalam membuat penentuan memilih kerajaan untuk berkhidmat kepada mereka pada pilihan raya umum akan datang.

Najib yang juga Pengerusi Barisan Nasional (BN), berkata berdasarkan pencapaian, rakyat perlu menimbang sama ada BN atau pembangkang yang boleh dipercayai untuk memimpin negara ini seterusnya.

"Satu perkataan yang amat bermakna pada pilihan raya kali ini ialah 'kebolehpercayaan'. Sama ada pengundi punya kebolehpercayaan pada BN atau pembangkang.

"Soal intipati pada PRU-13 ini ialah sama ada rakyat mempunyai kebolehpercayaan kepada (Ketua Pembangkang Datuk Seri) Anwar Ibrahim, (Presiden PAS Datuk Seri) Haji (Abdul) Hadi (Awang) atau dengan penuh rendah diri, kepada saya sebagai ketua kerajaan," katanya ketika melancarkan Manifesto BN di sini, Sabtu.

Berucap di hadapan lebih 50,000 penyokong di Stadium Putra Bukit Jalil, Najib berkata sekiranya rakyat memberi kepercayaan kepada kepimpinan beliau, mereka juga harus menyokong pasukannya dalam BN.

"Dengan perasaan penuh rendah diri, kalaulah rakyat Malaysia jawapannya ialah (percaya) pada Najib, maka sokong dan undilah Barisan Nasional.

"Saya tidak boleh melakukan perkara ini berseorangan, saya perlu pada pasukan saya dan pasukan saya akan bertanding, pasukan inilah yang perlu kita beri sokongan yang padu," katanya yang menerima tepukan gemuruh daripada hadirin.

Najib buat pertama kalinya akan memimpin barisan jentera BN pada PRU-13 selepas mengambil alih pucuk pimpinan kerajaan daripada Tun Abdullah Ahmad Badawi pada 3 April 2009.

Datuk Seri Anwar Ibrahim yang merupakan penasihat Parti Keadilan Rakyat (PKR) dan Presiden PAS Datuk Seri Abdul Hadi Awang pernah disebut-sebut bakal diangkat sebagai perdana menteri sekiranya pakatan pembangkang menguasai Putrajaya.

Yakin dengan keupayaan BN untuk memenangi hati pengundi, Najib menegaskan banyak yang telah dilakukan oleh kerajaan di bawah BN untuk rakyat berbanding pembangkang yang hanya pandai menabur janji.

Ini termasuk Anwar yang hanya gemar menabur cerita pengalamannya di dalam kerajaan, tetapi sebenarnya tidak melakukan apa-apa yang bermanfaat kepada rakyat dan negara, katanya.

"Soalnya bukan jangka masa dia dalam kerajaan yang harus diambil kira, tetapi apa yang dilakukan semasa dalam kerajaan. Bila krisis kewangan berlaku apa yang dia buat? Dia nak serah saja pada IMF (Tabung Mata Wang Antarabangsa), kalau begitu senang, tuan-puan pun boleh jadi menteri kewangan," ujarnya sinis.

Justeru, Najib menggariskan beberapa ingatan kepada pengundi mengapa BN harus

menjadi pilihan mereka pada PRU-13.

Katanya setiap undi kepada BN adalah undi untuk kestabilan dan kemakmuran ekonomi, harapan yang sebenar kepada rakyat dan satu undi untuk penyatuan bangsa Malaysia.

Sebaliknya, satu undi untuk pembangkang bermaksud satu undi untuk masa depan yang tidak menentu, masa depan yang gelap dan penuh kepalsuan dan undi untuk manifesto fantasi dan khayalan, katanya.

Najib seterusnya memberi pengakuan kepada rakyat Malaysia dan memohon maaf di atas ketidaksempurnaan pentadbirannya selama ini dan berjanji untuk memperbaikinya demi masa depan negara yang lebih baik.

BN juga kata Najib bertekad untuk memastikan masa depan rakyat terus diutamakan, kedaulatan dan keselamatan negara dipertahankan sekiranya masih diberi mandat sebagai kerajaan.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=940141>